



一擺難忘个旅行

恁多年來，出國旅行加加摺也有十過二十擺咧，無想著這下各國疫情嚴重，無人敢出國。人斯恁歪怪，越出國毋得斯越想出去，遽遽尋出頭擺出國翕个相片，一頭欸等燒茶，一頭搵等相片，該時个點點滴滴跔等相片一一浮現在佢个腦膈肚，有生趣、好搞个；有美好、得人驚个，這下想起來，全部都恁珍貴。其中印象最深个，就係三、四年前十日个倫敦自助旅行。

在倫敦，坐地鐵去哪位奈斯當方便，所以佢兜大體坐地鐵上上下下。倫敦个地鐵有百過年个歷史，大部分个地鐵站又老又大，還合無電梯好坐。有一日愛坐地鐵，俵仔兩公婆行在頭前，看著車仔停等咧，緊緊張張跳上車，地鐵个門黏時關忒，佢摺讀國小个孫仔無跔著，俵仔仰般碰門乜無用。兩子阿婆目金金看等車仔駛走，這下愛仰結煞正好呢？佢心肝肚想：該載孫仔个英文還做得，係撞走斯喊佢拜託警察送佢兜轉旅舍好咧。背尾正知孫仔想有阿婆這個大人好倚恃，也無幾驚，兩子阿婆靠這戇膽，各各心較定兜。好得下一枋車當遽斯來咧，來毋掣想恁多，煞煞跳上車，到第二站斯看著俵仔、心白嚇到面伸兩指大，頸根擱長長在月臺頂等，總算有驚無險。

還有一到，在上班時間坐地鐵，地鐵裡肚人尖人，轉身斯毋得。上車一下仔斯聽著孫仔當緊張講：「恩俵愛行到頭前个車廂去啦！」停動斯毋得愛仰般行，無人插佢。會到站咧，俵仔正看著車肚个走馬燈寫等這隻車廂下車毋得，乜聽著廣播喊下車个人愛行到頭前个車廂去，原來孫仔早斯看著、聽著咧，毋過這下昶慢咧。一到站，正知這最尾兩隻車廂還停在像大水管樣个暗窿肚，無月臺好下車。佢仰般斯恁毋解仰會有恁樣个事情，俵仔講可能係坐這條線个人緊來緊多，車廂緊接緊長，這隻老地鐵站个月臺嘎毋罅長咧。對有捷運正二十零年个臺灣人來講，半夜斯無胚著有恁樣个地鐵，也算開眼界、增智識咧。

去到英國个第三日，堵著曼徹斯特體育館个演唱會發生恐攻事件，死傷盡多人。過後無論去到哪位斯有帶銃仔个警察巡邏，尤其像倫敦地鐵站、觀光區這兜人多个位所。去教堂、古堡、博物館、大百貨公司參觀也愛排列仔檢查隨身个皮包仔，雖然麻煩兜，毋過分人安心盡多。過兩日仔去倫敦聖保羅教堂參觀，旨知教堂管制落毋得，愛等到下晝正開放。原來女王在教堂肚，毋知係為著恐攻个事情來祈福無？到晝，路脣緊來緊多人，原來女王愛走咧，跔等路人个指點，看著車隊裡肚个一輛車坐等著青衫个英國女王，雖然正看著一眼定定，乜係盡難得个經驗！

這擺个旅行，做得講係恁多擺旅行裡肚最多特別个。這下幹轉頭來看，恁多擺旅行遇著个奇奇巧巧事情，抑係好好壞壞經驗，串串起來就係佢彩色个人生！

作者：張美容

☆詞彙學習☆

【加加摺】ga` ga` ciu`：加加起來。

【歪怪】vai` guai`：自己不需要，看見他人有也想要的心態。

【十過二十擺】shib` go` ngi+ shib` bai`：十幾二十次。

【腦膈肚】no` gag du`：腦海裡。

【百過年】bag go` ngien：一百多年。

【電梯】tien+ toi`：指用電力作為動力來源的升降機或手扶梯。